

中國古典文學基本叢書



曾鞏集

下册



中國古典文學基本叢書

曾鞏集 下冊

陳杏珍 晁繼周 點校

# 曾鞏集卷第二十四

## 制誥擬詞三十首

### 吏部尚書制

尚書政本，而吏部天官，所以考擇人材，以成天下之務。近世既失其職，但受成事而已。今朕既正官名，且將歸其屬任。立法之始，推行在人。其於程能議功，定勳頒爵，當率厥屬，謹循科條，非得周材，曷稱茲位。某忠厚仁篤，秉義守正。列於侍從，休有令名。是用選而授之，其務將明。使朕所以作則垂憲，不獨於今可行，方當施之後世。蓋汝有稱職之美，則朕有知人之明。尚其懋哉，無替厥服。

### 吏部侍郎制

尚書本天下之務，而吏部典掌選舉，至於所屬之曹，有行封爵、議勳庸、稽功課之事，咸以咨焉。近世以來，職分於他司，而位爲虛器。今朕董正治官，使歸其名分，豈虛爲哉？固將循之以求其實。蓋明紀綱，定制度，以釐百工，熙庶績，此朕志也。侍郎實貳其長，非獨當修其官，且將推明新制，以行今而

傳後。則其選授，豈不重哉？某文學行義，有聞於時。列於從官，獻納惟允。是用命爾，實首茲選。其體予所以擇而使爾之意，務祇厥服，使政舉法行，稱朕之意。惟爾亦永有稱於後世，可不勉歟！

### 戶部尚書制

戶部之於中臺，爲周官司徒之職。掌財賦之調度，金穀之出入，以待邦國之用。歷唐五代，征斂煩興，而使名雜出。地官之職，蓋存虛號而已。今朕正名以定羣臣之位，辨位以責庶務之實。尚書政本，典領經費之司，所屬尤重。博求天下之士，以宜其官。某誠篤強敏，智慮精密。董煩治劇，材力有餘。民曹上卿，無以易汝。理財之術，待汝有爲。今歲入甚廣，而歲費所餘者無幾。使官用有節，而餘蓄可致；公藏贍足，而民賦可輕。在爾能知其方，庶幾承朕之志。尚懋爾守，以承厥叙。

### 戶部侍郎制

田疇生齒之籍，穀帛貨泉之計，下以制民之產，上以經國之用，地官之貳，實參總焉。朕方因能以用人，正名以授職，俾服予事，必惟其材。某頃以通敏之資，久更要劇之任。往副民部，孰如爾宜？夫知農之艱難而有以勸助，視財之豐匱而有以均節。使公藏贍足，而私蓄羨盈。朕將觀爾之能，爾其無懈於位。

## 禮部尚書制

昔舜命伯夷典禮，后夔典樂，至周並爲宗伯之官，今禮部尚書蓋其任也。威儀度數之詳，聲音律呂之別，莫不屬焉。精微之至，所以統和天人，順遂萬物，其體可謂大矣。矧今典領，實又考擇天下之材，夫能無曠其官，以充吾所以寄屬之意，歷選在位，今得其人。某明允直清，知經信道。制作之事，舊惟討論。春官古卿，是用授汝。朕承百王之敝，方欲作則垂憲，以成一代之典，使五禮之節同於天地，八音之和格於祖考，天下智謀材譎之士得而用之。待汝能稱其官，庶幾輔予於治。無懈於位，以副朕知。

## 禮部侍郎制

夫禮之節文，樂之和聲，所以成三材而育萬物。典掌之任，秩亞春官。朕方考正百工之名，而大修法度之政，其於寄屬，必惟其人。某材出土倫，學通經術。宗伯之貳，爾往欽哉。其思先王制作之方，而務知治民易俗之要，其於禮體<sup>一</sup>，非在於鐘鼓玉帛而已。尚稱厥職，以副予作則垂憲之心，可。

<sup>〔一〕</sup>「禮」，正統本、顧校本、章校本作「理」。

## 兵部尚書制

中臺政事所出，兵部司馬之任，所以典總師徒，揚國威武。至於按圖辨地，駕乘庫兵，司存之事，莫不咨焉。今朕考古以正官儀，將使處其名者必效其實，由是以推朕之志，明紀綱、成法度焉。八座之貴，夫豈輕以屬人？某明達事機，好謀能斷。列於侍從，忠益居多。夏官古卿，是用顯授。朕患今之兵不與農合，故因保伍之法，修閱試之令。庶夫使民知兵，近於古義。夫究宣朕意，使吏能奉承而民皆嚮勸，以共武之服。時汝稱職「一」，可不勉與！

「一」汝「元刻本、讀書記、顧校本、章校本、吳校本、傅校本作「謂」。

## 兵部侍郎制

夫兵天下之備，誰能去之？自古不出於井地，而將非六事之人，歷世以來，皆知古之宜復，而患夫勢之難行。朕獨慨然有志於是，故修保伍之令，明戰陣之教。先王之迹，庶或可幾。經營之勤，心亦至矣。惟是夏卿之亞，實參典領之司。方正官儀，尤慎推擇。其材敏忠篤，明習治體。折父之貳，往惟汝諧。夫能獎誘務農之民，悅趨講武之政，馴致有漸，而彌縫不疏，惟無廢爾之勤，可以輔朕之志。尚思自勉，以服訓辭。

## 刑部尚書制

昔舜命臯陶曰：汝作士，明於五刑，以弼五教。蓋刑者所以助治，而非致治之本也。其縱人輕重得失之際，人之舒慘繁焉，此古之聖王所以未有不先慎罰也。今朕悉心以正庶官之任，而中臺八座，典司邦禁，選用之體，得人惟艱。某明允通博，資以術學，服采於位，厥聲顯聞。秋官古卿，是用命汝。蓋前世之治，研雕爲樸，破觚爲圓，而憲綱疏，風俗美，朕甚慕焉。爾尚體朕之心，折民以恕，使辨訟自息，而王政寢明。可不勉歟，以輔台德。

## 刑部侍郎制

刑者所以禁人爲非，而聖王之所尤慎<sup>(一)</sup>。中臺總領之任，秩貳秋官之崇，朕方正名以稽羣吏之治，而大修制度之文，必惟其人，俾服予采。其慈恕忠篤，明習法令。參執邦典，莫如汝宜。夫能使民無冤，亦已善矣，推之可以至於使民無訟。爾尚勉哉，以承予綱紀四方之志。  
〔一〕「王」，元刻本、顧校本、吳校本、傅校本作「人」，並注「一作王」。

## 工部尚書制

昔舜咨於衆，疇若予工。羣臣薦垂，往祗厥叙。蓋繕修興造，程衆藝，飭五材，國家之務，不可以不

屬之其人。今中臺起曹，實踐其任，矧屯田、虛衡、平水之職，莫不隸焉。正名之初，其選尤重。某材力強敏，周於計畫。更閱內外，時稱汝能。俾服冬官，蔽自朕志。夫詳明品式，以訓匠建事，使費省於國，力寬於人，至於墾地、山林、溝洫之政，莫不畢舉，皆汝守也。其尚懋哉，以率厥屬。

### 工部侍郎制

夫飭五材，程匠事，國家之務所不可已也。故共工之貳，任屬非輕。朕方若稽舊章，財正官號，思得智能之士，以副采擇之詳。某開達敏強，明習典故。冬官寵列，俾介厥司。考究制度之文，紀綱修繕之政。在爾能舉其職，以稱吾經理萬事之心。其尚懋哉，往祇厥服。

### 禮部制

朕正羣司之名而責其實，歸天下之務而本之尚書，故郎選甚高。維春官之屬，禮樂所出，宜得智謀材諧之士，以修厥官。某業履望實，見於世用。考擇於衆，莫如汝諧。其尚體予董正治官之意，於夫創制之初，明紀綱，興曠廢。惟知其要，乃能圖其詳，其惟悉心以祇厥服。

### 主客制

朕甚重郎吏之選，欲以斂羣材，責功實。典客之任，列於右曹。維時聞人，宜服茲寵。國家之有賞

典，所以待汝有爲。

### 膳部制

牲豆酒膳，辨其儀數而修其政，春官之屬，郎秩甚寵。詢求材實，爾允僉言。尚思欽承，以稱推擇。

### 駕部制

輿馬輦乘之奉，郵驛圉牧之治，中臺要務，主以郎曹。敷求得人，俾任吾事。夫『駒』之頌，養馬之詩也，蓋其大旨，曰思無邪。然則爲政之方，斯可知矣。能識於是，夫何遠哉！

### 庫部制

甲盾弓矢之器，乘輿函篋之式，武藏之任，郎選甚高。得士於朝，屬任惟允。夫稽功實以勸賞，朕方必行，悉忠力於事焉，爾尚無懈。

### 都官制

係累春餉之人，恤其廩給，而申其訴競，主以郎吏，國之舊章。爾惟惠茲，宜蒞厥職。尚思奮勵，以

稱東求「東」。

「東」，萬曆本作「敷」；《讀書記》云：「宋本作東，疑是簡字」。

## 比部制

內外經費之事，總於句考之司，郎實主之，位重省闈。爾惟明敏，宜能厥官。惟時懋哉，以服予訓。

## 司門制

門關管鍵之事，啓閉出入之節，總其籍賦，而審其禁令，郎官之任，爾允詢求。尚敏勞能，朕將考察。

## 屯田制

率屯戍之兵，服畎畝之事，所以益邊省饋，佐國裕民。郎於中臺，總其政令。用爾之敏，宜能厥官。往服寵名，無忘奮勵。

## 虞部制

率屯戍之兵，服畎畝之事，所以益邊省饋，佐國裕民。郎於中臺，總其政令。用爾之敏，宜能厥官。往服寵名，無忘奮勵。

蒐田有時，而澤梁有禁，虞衡之守，所以遂嘉生而參化育。中臺典領，咸屬汝材。其思順鳥獸草木之宜，以稱朕愛人及物之意。

## 水部制

川瀆堤防，宣其利而備其害，四方萬里之遠，郎實總領，秩甚寵焉。爾以周材，朕用選授。夫知水之不可障，而導之使行，此成法也。推而見之於事，待爾能稱其官。

## 御史中丞制

御史府持吾邦法，所以糾官邪，繩不恪，輔予於治。非秉義純篤、望實敷於上下，不稱其任。某強毅肅括<sup>〔一〕</sup>，以褪其身。博學精識，通於世用。是以考擇於衆，寵以茲位。夫有守正向公之志，又有能辨是非之明，抗論於朝，使賢不肖忠邪不失其實，此法之所以爲治具，而能佐吾以善養人之意。使汝能宣其官，則朕爲得其所屬。尚體予訓，其惟懋哉。

〔一〕「括」，原作「哲」，據元刻本、正統本、章校本改。參見卷二十首篇校記。

## 知制誥授中司制

典掌明命，總持憲綱，非博學有文，強毅忠篤，曷可以兼斯任哉？某志行清夷，材資敏達。更踐內

外，試用惟允。論思禁掖，肅正朝端。蔽自朕知，拔於不次。惟明於體要，可以見於訓辭；惟公於是，可以施於刺督。尚懋厥守，方觀爾能。

### 中司授太中大夫制

朕正名以定百官之位，辨位以責庶務之實。矧風憲之臣，紀綱所屬，曷可以不明其任哉？某強敏開達，行誼仁篤<sup>〔一〕</sup>，學通古今，擢典訓辭，遂持邦法，宜專分職，以應新書。是用進爾之階，品在第四。俾爾納忠宣力，得壹意於中司，以董齊衆工，肅正內外。庶余之作則更制，罔或不虔。在爾懋哉，知其所守。

〔一〕元刻本無「行誼仁篤」四字，於「開達」下注「一作仁篤」。

### 責御史制

中執法所以糾官邪、繩不恪也，其可以自爲欺且怠歟？某拔於疏遠之中，服在此位。宜殫忠力，以稱所蒙。而按劾大臣，既非其實，稽其分職，則自緩焉。朕爲之優容，俾從薄責。而進對之際，公肆誕謾。屬吏推窮，獄辭明具。論其情則懷詐，比其治則瘳官。夫身任紀綱之司，而抵冒若此，雖朕欲貸汝，而知公議何。斥守偏州，尚仍階品。往新厥志，庶蓋前愆。

## 御史遷郎官制

御史董攝綱紀，肅正朝廷。於政之有不當於理，於臣之有不協於極，皆得言之。故吾甚重其選。爾有列於此，能勤厥職。雖歲月未久，而風望甚高。今有司奏爾之課，於法當遷。吾不得留，易之郎位。使爾之自效，能不擇言，則吾於報功，亦有異賞。爾其勉矣，無忘訓言。

## 御史知雜制

臺無大夫，中丞則御史之首。當專決庶務，實總邦憲。朕選於衆，然後屬之其人，豈不重哉？某敏茂直清，通於學問。輶自右史，往踐厥司。夫振舉紀綱以闡明法度，糾繩邪慝以肅正臣工。朕方虛心，志在於與人爲善。爾能苦口，無患於不得其言。其尚自強，以允公論。

## 監察御史制

御史持國綱紀「一」，所以糾官邪、齊内外。選衆而授，厥惟艱哉。爾好古知方，強於自立。刺察之任，往其欽哉。惟不回於爾心，以無撓於余法。在知所守，可不勉歟。

〔一〕「綱紀」，元刻本、正統本、顧校本、章校本作「紀綱」。

# 曾鞏集卷第二十五

## 制誥擬詞三十八首

### 秘書監制

帝王之治，必有圖籍之藏，又擇當世聰明拔出之士，聚於其間，使得漸磨文學之益，獎成其材，以待國家之用。故書省之設，吾不計近功，而要於廣畜德，所以厚其禮秩，而艱於用人，庶以明朕好古樂善之勤，而勵學士大夫之行也。某多識博聞，操守純篤，諸儒所尚，令聞惟舊，延處茲位，蔽自朕知。夫尊其所聞而行之不倦，使輔於世教而其效可言，非獨優游冊府而已。在爾自強，以承朕志。

### 著作郎制

麟臺著作之任，郎以詞學爲之，必惟其人。爾以材選，惟能明於理要<sup>(一)</sup>，乃可見於文章<sup>(二)</sup>。其尚勉於厥修<sup>(三)</sup>，朕方觀汝之效。

<sup>(一)</sup>「理」，章校本作「體」。

<sup>(二)</sup>「元刻本、顧校本、章校本、吳校本、傅校本無「可」字。

〔三〕「勉」，正統本作「敏」；吳校云「宋本作敏」。

## 秘書郎制

秘藏四部之圖籍，郎所守也。職清秩美，必也屬之其人。爾以材稱，俾服茲選。尚惟敏於畜德，朕方觀汝之能。

## 正字制

是正文字之官，實爲儒學之選。宜體育材之意，勉思畜德之勤。

## 殿中監制

分職殿內，參侍左右。監總六尚之官，以供服御之事。位視九列，禮秩甚優。正名之初，考擇惟慎。某明習吏治，勞閥有聞。選於在廷，俾踐厥任。往其祇飭，無忘訓詞。

## 殿中丞制

丞於殿內，參總六尚之官，而察其稽失。出於公選，首以材升。尚務欽承，方觀汝效。

## 太常丞制

丞於奉常，參總禮樂之事、祠祝之儀。惟學古知方，乃能不失其守。尚務祗飭，以服官箴。

## 衛尉卿制

典領宿衛之官，地親責重。位在九列，禮秩甚隆。考擇其人，屬任惟慎。某忠篤謹信，濟以材敏。周廬屯候之士，武庫弓鎧之器，往顧總治，僉曰汝諧。其尚懋哉，以祇朕命。

## 太僕卿制

《書》曰：「僕臣正，厥后克正。」蓋親近左右，有輔導之義。矧車府廄馬牧監之政，莫不咨焉。非得其人，曷稱厥位？某材質敏明，久更器使。司馭之選，汝惟克諧。其祇厥官，以服朕命。

## 大理卿制

折獄詳刑之事，朕所重也。典領之官，位在九列。正名之始，選用非輕。某明習吏治，通於法令。廷尉之任，僉曰汝諧。往其欽哉，以率厥屬。少云「參典之官，位茲九列」。

## 國子祭酒司業制

學校之法，雖使之通經術，治文字，然要其大致，則在於明上之教以導民，養人之材以成俗。故師氏之位，必惟其能。某質性粹冲，術業通博。訓誨之任，宜正寵名。夫行其所知，以先游學之士。使風化之出，自京師始。待爾稱職，可不懋哉。

## 太學博士制

博士以文學爲官，往者列於成均，其秩未正。朕登之朝序，所以尊庠序之教，而勵士大夫也。爾以經行選用，往服厥官。蓋尊其所聞，以誘率學者，汝之守也，惟是懋哉。

## 少府監制

百工伎巧之事，展采備物之政，典領之任，位視列卿。正名之初，考擇惟慎。某明習吏事，勞閔有聞。選於僉言，俾踐厥職。尚其祗飭，以服訓詞。

## 軍器監制

繕治戎械，訓工程作之任，置監典領，禮秩甚隆。正名之初，考擇惟慎。某明習吏事，勞閔有聞。選